

## DOMINGU XXXIII TEMPU KOMÚN – TINAN B

### Tema

Liturjia Domingu da-33 Tempu Komún nian apresenta mai ita, konvita ida ba esperansa. Nia konvida ita atu konfia iha Maromak Libertadór, istória nia Na'i, ne'ebé iha projetu definitivu moris nian ba ema sira. Tuir testu sira, Nia sei muda mundu nia nakukun ba loron foun ne'ebé la nahas.

*Leitura dahuluk* haklaken tempu libertasaun husi Maromak ne'ebé so'i nia Povu fiél, povu ne'ebé hetan persegisaun no sai dezanimadu. Ida-ne'e mak esperansa ne'ebé tenke tane ema justu sira, ne'ebé simu bolun atu sai fiél ba Maromak, apezarde persegisaun no prova. Sira-nia konstánsia no fidelidade sei hetan rekompensa ho moris rohan-laek.

Iha *Evanjelli*, Jezús garante ita katak, iha futuro ida laho data, mundu tuan egoíзму no salan nian sei monu no, iha nia fatin, Maromak sei hamosu mundu foun, vida no ksolok rohan-laek nian. Ba nia eskolante sira, Jezús husu atu matan-moris ba sinál sira ne'ebé hatudu realidade foun ne'e no disponivel atu hakohak projetu sira, apelu no dezafiu sira husi Maromak.

*Leitura daruak* fó hanoin katak Jezús mai mundu atu konkretiza Maromak nia projetu, liberta em ahusi salan no hatam nia iha dinámika ida moris rohan-laek nian. Nia hanorin ita manán egoíзму no salan no halo moris sai don ida domin nian ba Maromak no maun-alin sira. Ida-ne'e mak dalan mundu foun no vida definitiva nain.

### LEITURA I – Dan 12,1-3

#### MENSAJEN

Ba fiar-nain sira ne'ebé hetan persegisaun, autór livru nian haklaken Maromak nia intervensaun atu so'i nia povu. Nia refere ba “Miguel” nia intervensaun, xefe funu-na'in lalehan nian, ne'ebé Maromak haruka atu fó kastigu ba inimigu Maromak nia povu nian no proteje santu sira. Ba povu judaiku, “Miguel” mak espíritu husi lalehan ida (anju protetór ida) ne'ebé hein Maromak nia Povu no, hodi mandatu divinu, hala'o libertasaun ba justu sira ne'ebé hetan persegisaun, sira-ne'ebé nia naran hakerek iha livru vida nain (kf vers. 1). Intervensaun ne'e la fó de'it ba sira ne'ebé sei la'o iha mundu ne'e; maibé Maormak sei halo moris hi'as mós sira ne'ebé mate ona, atu fó prémiu ba sira-nia vida fidelidade nian no kastigu ba hahalok aat sira halo (vers. 2). Buat ne'ebé autór hakarak hateten maka Maromak nia intervensaun sei hapara injustisa, ipresaun, mate no sei hahú mundu foun justisa nian, ksolok nian, dame nian, moris loos nian.

Sira-ne'ebé, maski hetan persegisaun no taterus, mantein fiél ba Maromak no ba nia valór sira, sei manán moris rohan-laek. Autór la esplika ho modu diretu sá loos mak moris rohan-laek; maibé símbolu ne'ebé nia uza hatudu transfigurasaun ema sira ne'ebé moris hi'as fali (nabilan hanesan fotun...-vers 3). Vida foun ne'e ne'ebé hein ita la'ós vida ida hanesan mundu agora nian, maibé mundu ne'ebé ho moris ne'ebé nakfilak.

Ida-ne'e mak esperansa ne'ebé tenke tane ema justu sira, atu mantein fiél ba Maromak, apezarde persegisaun no prova. Sira-nia moris la'ós frakasu ida; maibé ho konstánsia no fidelidade sira sei hetan rekompensa ho moris rohan-laek. Iha ne'e mak hahú atu esbosu kona-ba teolojia moris-hi'as nain.

### SALMU RESPONSORIÁL – Salmu 15 (16)

## **LEITURA II – Heb 10,11-14.18**

### *MENSAJEN*

“Sakrifísiu ba salan” mak ai-riin kultu israelita nian. Nia funsaun mak selu Povu nia salan sira no hatutan fali komuñauun ho Maromak no fiar-na’in sira. Hosi oferese iha altár Tmeplu nian, balada ida nia moris, ema husi ba Jahwéh perdaun ba salan, hatudu intensaun atu kontinua hola parte ba Maormak nia komunidadade no hatudu vontade atu kesi fali ninia relasaun ho Maromak ne’ebé salan hakotu tiha. Ba autór Surat ba Ebreus sira, sakrifísiu sira-ne’e la efikás no la konsege hatutan fali komuñauun entre Povu ho Maromak. Buat sira-ne’e mak ritu esternu de’it no superfisiál, ne’ebé nunka nakfilak ema nia fuan toos no egoísta.

Jezús fali, hodi saran nia vida, konsege konkretiza objetivu atu hakbesik ema sira ba Maromak. Nia obedese Maromak iha buat hotu no oferese nia vida nu’udar don domin nian ba ema sira. Ho nia ezemplu no sasin, Nia propoin ba ema sira dalan foun ida, muda sira nia fuan no hanorin sira atu moris iha disponibilidade totál ba Maromak nia projetu, iha saran an totál ba maun-alin sirano salan no koloka ema sira iha dalan loos atu integra an iha Maromak nia família. Jezús nia sakrifísiu, oferese dala ida de’it, liberta duni ema sira, Nia halo sira sai perfeitu ba nafatin no santifika sira (vers. 14).

Kumpre tiha nia misaun iha rai, Jezús hatuur an iha Maromak nia kuana (vers. 12). Ilas ida-ne’e ilas triunfu no glória nian, no hatusu la’ós de’it katak dalan ne’ebé Jezús la’o mak dalan ne’ebé Maromak aprova, maibé, liuliu, sá loos meta finál ema nian: divinizaun, komuñauun ho Maromak, hola-parte ba Maromak nia família. Se dalan fidelidade nian ba Maromak nia orojetu no saran an ba maun-alin sira lori Jezús atu tuur iha Aman nia kuan, sira ne’ebé tuir Jezús mós sei to’o iha meta hanesa no sei tuur iha Maromak nia sorin. Autór Surat ba Ebreu sira, ezorta sarani sira atu moris iha fidelidade ba kompromisu sira asume hoKristu iha loron Batizmu nian. Sé mak apezarde difikuldade sira, la’o iha dalanhanehan Kristu nian, nia sei tuut iha Maromak nia sorin no moris, ba nafatin, iha komuñauun ho Maromak.

## **ALELUIA – Lc 21,36**

## **EVANJELLU – Mc 13,24-32**

### *MENSAJEN*

Versíkulu rua dahuluk testu nian – ho ilas mai husi tradisaun profétika no apokalíptika – refere ba mundu tuan ne’ebé sei monu, mundu ne’ebé opoin ba Maromak no persege fiar-na’in sira (vers. 24-25). Iha Is 13,10, loron no fulan ne’ebé sai nakukun haklaken loronintervensaun justisa nian husi Jahwéh atu harahun impériu nanilónika ni liberta Maromak nia Povu iha rai estranjeiru (kf. Is 34,4); iha Jl 2,10, ilas hanesan uza atu deskreve akontesimentu sira “Na’i nia loron nian”, loron ne’ebé Jahwéh intervein iha istória atu fó kastigu ba opresór sira no soi ninia eleitu sira. Ora, linguajen ne’e mak Marcos uza atu haktuir impériu sira ne’ebé luta hasoru Maromak no nia santu sira nia frakasu. Ne’e linguajen tradisionál ida ne’ebé, leitór sira Marcos nian komprende di’ak. Iha mundu gregu, porezemplu, loron no fulan (“Élios” no “Selénê”) maromak ne’ebé gregu sira adora, iha mundu romanu, imperadór identifika an ho “loron (imperadór Nero, persegidór dahuluk

sarani sira Roma nian, haruka harii estátua husi ritu aas metru 30 ne'ebé representa nia nu'udar maromak "loron"). Mensajen evidente liu: istória atu nakfilak; orden relijioza no polítika tuan, kbiit sira ne'ebé kontra Maromak no persege santu sira sei hamonu hotu, atu fó fatin ba mundu foun ida, harii tuir kritériu no valór sira Maromak nian. Marcos la refere, iha ne'e, ba buat ne'ebé ita baibain dehan mundu nia roahn (fim do mundo); maibé refere ho modu jerál ba Maromak nia vitória hasoru buat aat ne'ebé hanehan no halo ema sira ne'ebé adere ba Maromak nia proposta sai atan.

Mundu tuan nia rohan sei akontese ho Mane Maksoin ninia mamaik (vers. 26). Ilas ne'e lori ita ba Dn 7,13-14, iha ne'ebé haklaken katak "Mane Maksoin" sei mai "iha kalokan leten" atu afirma ninia kbiit no ukun hasoru nasaun hotu mundu nian. "Mane Maksoin" ne'ebé ho kbiit hotu sei halibur ninia eleitu sira (vers. 27), la'ós seluk maibé Jezús duni . Ho ilas idane'e, Marcos asegura fiar-na'in sira Kristu nia truiunfu definitivu, atu liberta sira ne'ebé maski iha persegisaun karik bá, kontinua la'o ho fidelidade iha Maromak nia dalan sira. Marcos nia mensajen ba leitór hakarak dehan katak fiar-na'in sira sei hetan persegisaun, maibé keta monu iha dezesperu basá Jezús sei mai..

Parte daruak testu nian (vers. 28-32), haktuir Jezús ne'ebé hatán ba lia-husun eskolante sira-nian iha Mc 13,4: "Bainhira mak buat sia ne'e hotu sei mosu no sinál ne'ebé mak hatudu nia atu hotu".

Ba Jezús, importante liu define bainhira tempu loos mundu tuan nia rihan mak iha konfiansa katak mundu foun seu mai no matan moris ba sinál sira ne'ebé hatudu mundu foun atu mai. Ai-figeira nia dikin foun ne'ebé mosu tinan-tinan no hatudu ba to'os-na'in bailoron ne'ebé atu mai daudaun no tempu ku'u nian (vers. 28-29), nune'e mós hetan konvite atu hein, ho konfiansa mundu foun nia mamaik no haree sinál sira ne'ebé hatudu mundu tuan nia rohan no tempu libertasaun ne'ebé mai. Ho serteza kona-ba Na'i ne'ebé mai, matan moris ba sinál sira ne'ebé haklaken kona-ba Nia, sarani sira bele prepara sira-nia fuan atu simu Nia, atu aseita dezafiu sira ne'ebé nia lori, atu kaer metin oportunidade sira ne'ebé nia oferese.

La iha data ida marka ona ba realidade foun nia adventu (vers. 32). Maibé sarani sira bele iha serteza ida: Jezús nia liafuan sira la'ós teoria furak ida ka hakaran santu de'it; maibé garantia katak mundu foun, vida nakonu no ksolok rohan-laek, sei mosu duni (vers. 31).